

# Integraziun, in'incumbensa permanenta

Pled d'avertura per la sessiun da primavaira

■ **(anr/fa) Integraziun è stà il tema dal pled d'avertura dal president dal cussegl grond Vitus Dermont. El ha rendì attent a la situaziun linguistica dal Grischun e las consequenzas che quella ha per la tematica integraziun.** «Quant amiaivel è il Grischun envers ils umans?», cun questa dumonda ha entschet *Vitus Dermont* ses pled d'avertura per la sessiun d'avrigl dal parlament grischun. Ins pudess baingea pensar ch'il Grischun sco sistem statal na possia avair nagins sentiments umans, ha'l cuntinuà, «in sistem statal è però bler dapli che mo ses territori e sia suveranità territoriala». La qualità d'in stadi sa mussa tenor el er en la qualità da sias leschas, da las intervenziuns parlamentaras, las communicaziuns da la regenza, «da quella lavur che vegn pratigada da legislativa, executiva e specificamain da la giudicativa, quai è la lavur umana.» El è perquai vegnì a la conclusiun che sia dumonda davart quant amiaivel ch'il chantun saja envers ils umans saja perquai ina dumonda politica. «Quella premetta che nus politichers e politichers hajan la voluntad dad avair adina en egl il bainstar dals umans», ha ditg il president dal cussegl grond. Sco exempel ha'l menziunà l'integraziun.

## Per migrants sco era per glied da fatschenta

Integrar vul dir tenor Dermont incorporar e dar las medemas schanzas ed attenziun a tuts: «Quel princip d'integraziun vala per migrants e migrants da medema maniera sco per glied da fatschenta da la Germania u per persunas pensiunadas da l'Argovia che sa domicilieschan en noss chantun.» L'integraziun possia chaschunar er agitaziuns e turbulenzas, ha'l menziunà, «quest process da las turbulenzas valia da concepir, da negoziar e da suppor-

tar politicamain, socialmain e culturalmain – en il rom dal stadi da dretg.» Ins veglia far quai cun tschertgar soluziuns che resguardian la dignità umana, «vul dir, cun soluziuns ch'èn amiaivlas envers ils umans», ha infurmà il president dal cussegl grond e punctuà che quai signifitgeschia che tutas duas varts stoppian sa sfadiar, era quels che veglian s'integrar: «Jau n'avess nagin plaschair sch'integras da mes scolars refusassan da dar il maun e n'acceptassan betg nossas valurs.»

## Er ina incumbensa interna

En il chantun Grischun cun tantas differenzas culturalas e linguisticas è l'integraziun, sco che Dermont ha ditg, ina incumbensa permanenta er vers anen: «Betg mo persunas novarrivadas ed immigradas han il dretg da vegnir integradas en nossa societad, era nus che vivain e lavurain qua dapi generaziuns stuvain ans sfadiar per che nus ans chapeschian adina meglier in l'auter.» Per

cuntanscher questa finamira, per ch'in abitant dal Partenz possia chapir ils motivs da l'abitant da la Val Calanca, u per che quel dal Signuradi enclegia era quel da la Val Müstair, gioga a ses avis la lingua ina rolla essenziala. «L'integraziun funcziuna mo sche tutas duas varts sa sfadian ed han encltega per las differenzas», ha accentuà Dermont, «tuts ston esser pronts da ceder privilegis e da metter da la vart interess particulars.»



Il president dal cussegl grond, Vitus Dermont, ha tematisà en ses pled d'avertura l'integraziun en sias differentas furmas.

FOTO F. ANDRY